



SPORTSKI RIBOLOV I TURIZAM

Uspješna saradnja Saveza sportskih ribolovaca BiH i drugih organizacija koje se bave unapređenjem ribarstva

Savez sportskih ribolovaca Bosne i Hercegovine, prema svojim statutarnim odredbama, je organizacija udruženja sportskih ribolovaca čiji je cilj razvijanje sportskog ribolova i ribolovnog turizma na području SR BiH. Među mnogim obavezama koje Statut postavlja pred Savez jeste i zadatak preduzimanja mjera i akcija usmjerenih na jačanje materijalnih osnova udruženja za zaštitu i unapređenje ribljevog fonda. Smatrajući da je riblji fond u ribolovnim vodama baza za razvijanje sportskog ribolova i ribolovnog turizma i da od bogatstva ribljevog fonda zavisi dalji razvoj sportskog ribolova, Savez je preuzeo mnoge obaveze i zadatke koji treba da doprinesu unapređenju ribljevog fonda.

Upravni odbor Saveza i njegova Komisija za unapređenje ribarstva već više godina sprovode posebne programe za unapređenje ribarstva, koji pored akcija poribljavanja ribolovnih voda, obuhvataju i mjere zaštite i čuvanja ribljevog fonda, zdravstvenu zaštitu i mjere za poboljšanje i povećanje proizvodnje u ribogojnim objektima i drugo. U sprovođenju svojih programa Savez traži i prihvata saradnju svih privrednih i drugih organizacija koje na bilo koji način mogu da doprinesu unapređenju ribarstva. Takva praksa uslovljava je da je Savez svojevremeno, domoseći novi Statut, u članu 3 statuta predvidio da članovi Saveza pored udruženja sportskih ribolovaca, mogu biti i ostale organizacije koje se bave unapređenjem ribarstva i ribolovnog turizma.

Odmah po donošenju novog statuta Savez je uputio pisma svim ribogojnim objektima, sa kojima je do tada uspješno saradivao i drugim privrednim organizacijama koje koriste ribolovne vode za sportski ribolov i ribolovni turizam, sa pozivom da se u članu u Savez. Ovaj poziv nije ostao bez odziva i do danas je stupilo u članstvo Saveza već sedam organizacija među kojima četiri ribogojna objekta za proizvodnju salmomidnih vrsta riba, dvije organizacije koje koriste ribolovne vode za sportski ribolov i jedan ribnjak. Konkretno u članstvo Saveza stupili su: Ribogojno mrestilište »Žunovnica«-Hadžići, Mrestilište i ribogojilište Blagaj kod Mostara, Mrestilište i ribogojilište »Bistrica«-Livno, Ribogojilište »Sistica« (Boračko jezero)-GSP Sarajevo, Poljoprivredno dobro »Sanićani«-Prijedor, Uprava Nacionalnog parka »Sutjeska«-Tjentište i Sumsko privredno preduzeće »Koprivnica«-Bugojno. Načelnu saglasnost za stupanje u članstvo Saveza izrazilo je i Poljoprivredno dobro »Motajica« iz Šupca (Ribnjak Bardača).

Već tri godine Savez praktikuje da u toku meseca marta održava sastanak sa ribogojnim objektima za proizvodnju salmomidnih vrsta riba na kojem se vrši dogovor o obimu proizvodnje i vrstama riba koje treba proizvoditi, uzrastu i cijenama mladi, rokovima isporuke i drugim uslovima za isporuku. Savez vrši dispozicije za isporuke vodeći računa da ribogojnim objektima obezbjedi siguran plasman proizvedene

mladi a udruženjima obezbjedi mladi po najpovoljnijim cijenama i uz što manje transportnih troškova. Prema svojim materijalnim mogućnostima Savez omogućuje ribogojnim objektima i korišćenje avansa za proizvodnju salmomidnih vrsta mladi a pruža im i drugu pomoć. Ove godine Savez je organizovao u Prijedoru i sastanak predstavnika ribnjaka radi dogovora o proizvodnji i isporuci ciprinidnih vrsta riba za poribljavanje ravničarskih voda ali odziv na ovaj sastanak nije bio prema očekivanju iako je poribljavanje ravničarskih voda sve aktuelnije i ubuduće se očekuje sve veća potražnja ciprinidnih vrsta riba.

Članarina Saveza za pomenute organizacije iznosi svega 500 n. dinara godišnje a kroz članstvo u Savezu organizacije se upoznavaju sa svim kretanjima i mjerama za unapređenje ribarstva, sportskog ribolova i ribolovnog turizma u Bosni i Hercegovini. I ovim članovima, kao i ostalim svojim udruženjima, Savez obezbjeđuje i nabavlja potrebnu mladi za poribljavanje i participira u troškovima nabavke mladi iz svog Fonda za unapređenje ribarstva. Ove organizacije, u smislu zaključaka skupštine Saveza, priznaju članovima organizacije sportskih ribolovaca pri obavljanju sportskog ribolova na njihovim vodama poseban tretman. Naime sva udruženja sportskih ribolovaca, kao korisnici ribljevog fonda, odredili su svojim pravilnicima različite naknade za dnevne ribolovne dozvole. Najnižu naknadu plaćaju članovi organizacije sportskih ribolovaca a učinjena je razlika između građana SFRJ koji nisu članovi organizacije ribolovaca i inostranih turista koji plaćaju najviše naknade. Logično je da članovi organizacije sportskih ribolovaca plaćaju najniže naknade, jer kao članovi udruženja učestvuju u društvenom radu koji je danas u našim udruženjima vrlo odgovoran a bazira se na amaterskom radu. Članovi udruženja učestvuju u društvenoj čuvarskoj službi i u mnogim drugim akcijama zaštite i unapređenja ribljevog fonda a pored toga, svake godine pri obnovi članstva, dužni su da unapred uplaćuju za ograničeni broj lovnih dana (za 40 do 50 dnevnih izlazaka na vodu godišnje) 80 do 120 novih dinara i na taj način omogućuju planiranje sredstava za zaštitu i unapređenje ribljevog fonda. Naši građani koji nisu članovi organizacije sportskih ribolovaca i inostrani turisti nemaju pomenutih obaveza i normalno je da plaćaju i veće naknade od onih koje su danas određene.

Ovakva saradnja Saveza sportskih ribolovaca BiH i privrednih i drugih organizacija koje se bave unapređenjem ribarstva i ribolovnog turizma već je pokazala dobre rezultate. Savez i njegovi članovi su neobično zainteresirani da ribogojni objekti i ribnjaci proizvode što više mladi i matične ribe za poribljavanje ribolovnih voda i da se dobro gospodari na istima radi čega žele da se ova saradnja još bolje razvije. Zajednički naponi i mjere na zaštiti i unapređenju ribljevog fonda doprinijeti će jačanju materijalne baze za razvoj sportskog ribolova i ribolovnog turizma, a od toga će imati koristi ne samo ribogojni objekti i organizacija sportskih ribolovaca nego i cijela društvena zajednica. Milan Vinterhalter, Sarajevo